


Fasnacht 2007

## Mutze-Bebbi Bärn



## Adie PLUTO

\* 18.2.1930 † 24.8.2006

Fassigslos mien mir verkinde  
dr Planet PLUTO muess verschwinde:  
Zem Zwärgplanet muess är verfalle,  
sy Kuiper-Girtel änger schnalle.  
Die PLUTONisch Liebi isch verebtt,  
will hit Liebi ooni Sex nimm hebt.

### **Findsch Du das astrologisch logisch? Fir mi ischs PLUTÔt demagogisch...**

D AstroGnome hänn in Prag  
ussghoolt zue däm Schiggals-Schlag  
und als PlanetARIER bestimmt  
wär d Hürde zem Planet-syy nimmt.  
D Greessi syygi s ainzig wichtig,  
dr PLUTO aber undergichtig;  
es fääli em die kritisch Masse  
wo s hitte bruuch fir volli Kasse  
(*d Kate Moss wacht uff und ka s nit fasse:  
Nur ooni Masse machsch doch Kasse!*):

S Planete-Comité Tribunal  
Setzt mit em PLUTO e Fanal:  
Wurd är die Glaine-n-um sich schlugge,  
und sich zer Sunne fiire drugge,  
in graade Baane-n-umme flitze,  
statt blaich de Grosse d Route z gryze -  
wär nid Exzentrik em Programm,  
dr PLUTO gheerti stramm zem Stamm.

### **Schyssdrägg-ziigli, kennsch dä Wahn, vo Comité und Umflaubahn?**

Dr PLUTO isch scho bi de Grieche  
ain gsi vo dene liebe Sieche,  
wo d Gschwister im Olymp losst sitze  
und sälber duet bim Schaffe schwitze.  
Drum het är sich - im Käller unde -  
als Gott vom Hades wiidergfunde  
(*macht nyt, au d Kate liebt d Unterwält,  
vo deert kunnt schliesslig s groossi Gäld*).

Dä Himmels-Sturz zaigt examplarisch

Wenn di als Bäär in d Schwyz veriirsch;  
noo dryssig Joor entlosse wirsch;  
wie me-n-als z glaine mitte dra isch;  
wenn zhinderscht läbsch imAlpedaal;  
wenn s Gäld nimm längt fir ins Spidaal;  
wenn d hungrisch in dr Sahelzone;  
wenn d nimmi wotsch in Schachtle woone;  
denn merggsch: Drotz CS, Banggverain,  
bisch ganz elai, es hilft e kain.

### **Sigg Sagg Sugg – das Spiil isch alt, die Glaine driffts fascht immer kalt.**

Doch merggsch, wie d „Fachlyt“ ungeniert  
juscht dä Planet hänn degradiert,  
wo lang scho isch zem Stärn mutiert?  
Als Comics-Star isch ney gibore,  
mit grienem Halsband, lange-n-Oore?  
Dr PLUTO stygt als Disney-Kläffer  
vom Himmel ab - in d Äärde-Käffer.  
Als Doot-Gott mit Naarekappe,  
duet luschtig är no Gnoche schnappe,  
frisst e Mars, liggt denn an d Sunne  
und macht uff d Äärde zletscht e Brunne.

**Bi soovvyl Jux merggt kain, verdori,  
dä Hund isch e Memento mori,  
wo freyt sich uff die letschti Stund,  
will denn kunnt jeede uff e Hund!**  
(*statt uffem Aff, duet d Kate do kund,  
bin yych vyl lieber uffem Hund*).

Goot all das schief het Teheran  
mit Gruess an Bush e Rettigsplan:  
**„Fir Uran, PLUTonium  
gits im Iran Asylum“.**

---

Anstell vo Sunneblueme-Spände gedängge Si dr Supernova-  
Uusstellig uf em Minschterplatz vom Määntig znacht bis am  
Mittwuch demoorge!